

Bunter Oktober

Omm Mondaach so geeche fünf hotts Telefon geklingelt, ess Kättche war droo unn sie war gonz uffgereecht. Honnes, hott se gerufe, hosde se gesehe?

Ich war aach noch gonz newer de Kapp. Ja, im Gadde geheert unn uff de Gass gesehe, es warn fünf odder sechs riesich große Schwärm. Die misse all uff oomol losgeflooche soi. Wahrscheinlich werrds dene bald zu kalt dort owwe. (Dort owwe, dess iss Mecklenburg-Vorpommern, unn denes bald zu kalt werrd, dess sinn die Kraniche, unns Kättche waaß halt, dass ich die Sort Veechel gern seh unn heer unn doo wollt se mich druff uffmerksam mache.) Dann frächts Kättche awwer noch: Honnes, warum wenn merr dess Wort Oktower in de Mund nimmt, heert merr sofort: Goldener Oktower? In de Wohnstubb sitzt de jingsde von unserne Enkel unn der will dess wisse.

Kättche, habb ich ze Antwort gewwe, ich glaab dess iss enn Reflex, wo oo Wort e onner Wort erauslocke dut, doo denkt merr gar nimmi driwwer nooch. Oktower – schee Wetter – Goldener Oktower – enn Reflex! Uff de onner Seit, iss nitt grad der Oktower, den merr jetz erlewe, werklich golden?

Naa, sächts Kättche, dess isses joo. Der Bub frächt mich doch, warum der golden heeßt unn eichentlich bunt haaße misst, wenn er jetz dess Laub uffem Boddem leie siehr, rot odder gelb unn mett alle Farwe dezwische, nor nitt mett gold.

Doch, saach ich, doo musser nor richdisch hiegucke. Unn nitt uff de Boddem, naa, direkt ins Laub uff de Beem. Wenn die Sunn dorsch die Blätter scheint, sehn vill von dene werklich golden aus. Ess kennt awwer aach soi, dass „Goldener Oktower“ nix mettem Laub, naa, was mett de Woitrauwe ze due hott. Weil die Trauwe, so reif wie se jetz sinn, in de Sunn wie aus purem Gold erschmolze aussehe unn weil, wenn die Sunn noch e paar Daach in die Woibersche scheint, de Woi so gut werrd, dass er im nächste Johr die Säckel von de Woibauern vergolde dut. Was machder dann grad, de ... wie heeßder?

Kevin, sächts Kättche. Der will Herbstlaub presse. Dess iss aach so was: Doo hotter zeh odder zwölf Blätter mettgebracht unn hott mich gefroocht, von was ferr Beem die wärn. Vier habb ich gekennt, Ahorn, Birke, Kastanie unn von emm Äppelboom, awwer die onnern kenn ich nitt. Ich det se kenne, wenn ich die Beem sehe det, von dene die erungerfalle sinn. Awwer so, nor dess Blatt? Doo kann ich emm nitt helfe.

Kättche, habb ich gesaat, dess wär awwer wichdisch. Woher hotter dann die Blätter? Ei, sächts Kättche, die hotter vorne im Park uffgelese.

Ich saach: Machs doch so, geh mettem enaus unn dann hebder nochemol Blätter uff. Weil dann kennsde die Beem unn dann waaßde wasses ferr Blätter sinn.

Gut, hotts Kättche gesaat, mach ich. Ich habbem sowieso gesaat, dass er Löschblätter brauch, zwische die merr die Blätter leeche muss wenn merr die Bicher nit kaputt mache will. Dann gehn merr gleich e paar kaafe.

Naa, saach ich, nemmt Zeidungsabier, dess duts aach. Wie dut ihr dann presse?

Ess Kättche druff: Ich habb e paar schwere Bicher vom Speicher gehollt unn wie ich mett dene in die Wohnstubb kumme bin hott de Kevin gesaat: Ach Oma, jetzt weiß ich für was so dicke Bücher gut sind. Denn mit meinem Laptop hätte ich die Blätter nicht pressen können. Doo konnt ich merrs nit verkneife unn saach: Bub, mettem Gugel aach nitt.

Awwer dann, uff oomol, kreischt se ins Telefon: Honnes, mach dich uff die Gass, jetz kimmt widder enn Schwarm, ich heer se schunn trompete. Eiern Honnes